

VENDIM
Nr. 230, datë 20.12.2019

MBI MIRATIMIN E KONTRATËS TË LIDHUR NDËRMJET SHOQËRIVE
“ALBPETROL” SHA DHE “ALBGAZ” SHA, PËR SHËRBIMIN E TRANSMETIMIT TË
GAZIT NATYROR, PËR NJË AFAT NJËVJEÇAR,
DUKE FILLUAR NGA DATA 1.1.2019–31.12.2019

Në mbështetje të nenit 16 të ligjit nr. 43/2015, “Për sektorin e energjisë elektrike”, të ndryshuar; të nenit 35 dhe të nenit 36, të ligjit nr. 102/2015, “Për sektorin e gazit natyror”; të vendimit të Këshillit të Ministrave nr. 848, datë 7.12.2016. “Për krijimin e shoqërisë “Albgaz” sh.a. dhe përcaktimin e autoritetit publik që përfaqëson shtetin si pronar të aksioneve të shoqërive: “Albgaz” sh.a. dhe “Albpetrol” sh.a.”, si dhe të nenit 15, të “Rregullores së organizimit, funksionimit dhe procedurave të ERE-s”, miratuar me vendimin e Bordit të ERE-s nr. 96, datë 17.6.2016, bordi i ERE-s, në mbledhjen e datës 20.12.2019, pasi shqyrtoi relacionin nr. 114/15 prot., datë 11.12.2019, të përgatitur nga drejtoritë teknike për miratimin e kontratës për shërbimin e transmetimit të gazit natyror, të lidhur ndërmjet shoqërisë “Albgaz” sh.a. dhe shoqërisë “Albpetrol” sh.a. për vitin 2019,

konstatoi se:

- Bordi i ERE-s, me vendimin nr. 49, datë 27.3.2019, ka filluar procedurën për miratimin e kontratës me nr. 1026 prot., të “Albpetrol” sh.a., datë 4.2.2019, dhe nr. 25 prot., të “Albgaz” sh.a., datë 25.2.2019, të lidhur ndërmjet shoqërive “Albpetrol” sh.a. dhe “Albgaz” sh.a., për shërbimin e transmetimit të gazit natyror, për një afat njëvjeçar, duke filluar nga data 1.1.2019–31.12.2019.

- Në vijim të kësaj vendimmarrje, me shkresën nr. 32/1 prot., datë 27.3.2019, është bërë njoftimi në medien e shkruar dhe me shkresën nr. 222/1, datë 29.3.2019, janë njoftuar palët për fillimin e procedurës dhe është kërkuar prej tyre shpjegim në lidhje me sasinë e parashikuar të gazit natyror që do të transmetohet, duke qenë se nga krahasimi me vitin paraardhës, u konstatua ulje e sasisë së gazit të transmetuar.

- Në përgjigje të sa më sipër, shoqëria “Albpetrol” sh.a., me shkresën e protokolluar në ERE me nr. 222/2, datë 15.4.2019, ka bërë me dije argumentet në lidhje me sasinë e gazit të prodhuar.

- ERE, në datën 2.5.2019, ka organizuar seancë dëgjimore mes përfaqësuesve të ERE-s: “Albgaz” sh.a. dhe “Albpetrol” sh.a., në të cilën u diskutua mbi përcaktimin e sasisë së gazit natyror që do të transmetohet gjatë vitit 2019 dhe fitimin e munguar për “Albgaz” sh.a., në lidhje me realizimin e një sasive transmetimi të gazit natyror më të vogël se ajo e parashikuar në kontratën për shërbimin e transmetimit të vitit 2018.

- Duke qenë se në draftin e paraqitur për miratim në ERE, u konstatua mungesa e parashikimit të penalteteve për palët, në rast të mosperformancës, si dhe nisur nga situata konfliktuale e krijuar mes palëve, për shkak të kësaj mosperformancë për vitin 2018, në seancë u dakordësua që palët: “Albgaz” sh.a. dhe “Albpetrol” sh.a. do të përcjellin në ERE propozime konkrete, në lidhje me parashikimin e penalteteve për mosperformancën e palëve, duke kërkuar nga ERE rishikimin e kontratës për vitin 2019 dhe shtyrjen e vendimmarrjes finale për miratimin e saj, deri në shqyrtimin e këtij propozimi.

- Pas seancës dëgjimore dhe kërkesave të vazhdueshme të ERE-s, shoqëria “Albpetrol” sh.a. ka përcjellë shkresën e protokolluar në ERE me nr. 222/7, datë 25.6.2019, me anë të së cilës ka kërkuar shtyrjen e vendimmarrjes finale të bordit të ERE-s për këtë kontratë, duke argumentuar se nga ana e shoqërisë “Albpetrol” sh.a. janë kryer ndryshimet përkatëse në kontratën e transmetimit të gazit natyror për vitin 2019, dhe ky draft i është dërguar shoqërisë “Albgaz” sh.a., për të parashtruar objeksione të mundshme, në lidhje me ndryshimet e bëra në kontratë. Po ashtu, nëpërmjet këtij komunikimi shoqëria “Albpetrol” sh.a. i ka kërkuar shoqërisë “Albgaz” sh.a. paraqitjen sa më shpejt të këtij drafti për nënshkrimin e përbashkët dhe përcjelljen e tij për miratim në ERE.

- Duke qenë se nga ana e “Albgaz” sh.a. nuk pati korrespondencë zyrtare për dhënien e opinioneve mbi këto ndryshime, ERE, në mbështetje të neneve 27 dhe 29 të “Rregullave të organizimit, funksionimit dhe procedurave të ERE”, miratuar me vendimin e bordit nr. 96, datë 17.6.2016, zhvilloi një seancë dëgjimore mes përfaqësuesve të ERE-s: “Albgaz” sh.a. dhe “Albpetrol” sh.a., në të cilën u diskutua për ndryshimet e bëra nga “Albpetrol” sh.a. në kontratën e shërbimit të transmetimit të gazit natyror për vitin 2019, si dhe për parashikimin e penalteteve të mundshme në dispozitat e saj.

- Përfaqësuesit e shoqërisë “Albpetrol” sh.a., gjatë seancës dëgjimore deklaruan se sasia faktike e gazit natyror që disponojnë për t’u transmetuar është 600.000 (gjashtëqind mijë) Nm³ në vit, e cila prodhohet në Cakran, Poligoni i matjes së gazit në Stacionin e Kompresorëve Drenovë. Si e tillë u bë nga ana e tyre korrigjimi i kësaj sasive në kontratë të cilën e konsideruan si lapsus. Ata deklaruan se këto specifikime janë dhënë edhe në nenin 7, pika 7.1 e kontratës.

- Në përfundim të seancës dëgjimore, për palët u la detyrë që, brenda datës 12.7.2019, të përcjellin në ERE kontratën e dakordësuar dhe të nënshkruar, në mënyrë që ERE të vijojë pa vonesë me miratimin e saj. Palëve iu bë me dije, gjithashtu, se: “nëse nuk do të ketë një amendim të dakordësuar të sa më sipër, ERE do të vlerësojë e shprehet në lidhje me miratimin ose jo të kontratës për të cilën ka filluar procedurën me vendimin nr. 49, datë 27.3.2019”.

- Duke qenë se në ERE nuk mbërriti asnjë korrespondencë nga shoqëritë “Albgaz” sh.a. dhe “Albpetrol” sh.a., në lidhje me sa lënë detyrë në seancë dhe risjellë në kujtesë në vijim nga ERE, me shkresën nr. 222/9 prot., datë 10.7.2019, ERE iu drejtua sërish palëve: “Albgaz” sh.a., “Albpetrol” sh.a. dhe MIE-s, me shkresën nr. 222/13 prot., datë 30.8.2019, duke i ftuar në një seancë tjetër dëgjimore në datën 2.9.2019, për të diskutuar ndryshimet e propozuara në të nga “Albpetrol” sh.a.

- Pas diskutimeve në seancë me palët për sasinë e gazit natyror dhe të orientimeve që dha MIE, u dakordësua midis palëve, që, brenda 10 ditëve të përcjellin për miratim në ERE draftin final të dakordësuar, duke mbajtur në konsideratë reflektimin e rekomandimit të MIE-s, në lidhje me sasinë faktike të gazit natyror të prodhuar/të transmetuar gjatë 8-mujorit të parë të vitit 2019 dhe sasinë e parashikuar për 4-mujorin e mbetur të këtij viti, referuar programit ekonomik të miratuar nga Ministria e Infrastrukturës dhe Energjisë, të shoqërisë “Albpetrol” sh.a. në kontratën e dakordësuar.

- Në përgjigje të sa më sipër, shoqëria “Albgaz” sh.a., me shkresën e protokolluar në ERE me nr. 576, datë 20.9.2019, ka përcjellë në ERE draftkontratën e transmetimit të gazit natyror midis “Albgaz” sh.a. dhe “Albpetrol” sh.a., për vitin 2019, nga analizimi i së cilës rezultoi, se: “Drafti bashkëlidhur kësaj shkrese nuk mban nënshkrimin e asnjë prej palëve të saj”.

- Në lidhje me sa më sipër, duke qenë se nuk pati asnjë përgjigje apo kontratë të depozituar në ERE nga palët për konfirmimin e dakordësisë së këtyre ndryshimeve, u vijua me analizimin e draftkontratës së përcjellë nga “Albgaz” sh.a., me shkresën nr. 576, datë 20.9.2019.

- Bazuar në vendimin e Këshillit të Ministrave nr. 848, datë 7.12.2016, “Për krijimin e shoqërisë “Albgaz” sh.a. dhe përcaktimin e autoritetit publik që përfaqëson shtetin si pronar të aksioneve të shoqërive: “Albgaz” sh.a. dhe “Albpetrol” sh.a., shoqëria “Albgaz” sh.a., ushtron aktivitetin si Operator i Kombinuar i Sistemit të Transmetimit dhe Shpërndarjes së Gazit Natyror në Shqipëri.

- Shoqëria “Albgaz” sh.a. është licencuar në aktivitetin e transmetimit të gazit natyror me vendimin e bordit të ERE-s, nr. 188, datë 10.11.2017, për një afat 30-vjeçar.

- Me vendimin e bordit të ERE-s nr. 179, datë 8.11.2017, shoqëria “Albgaz” sh.a. është certifikuar si Operator i Kombinuar i Gazit Natyror, si dhe me vendimin e bordit të ERE-s nr. 187, datë 10.11.2018, është licencuar në aktivitetin e shpërndarjes së gazit natyror, për një afat 30-vjeçar.

- Shoqëria “Albpetrol” sh.a., kryen aktivitetin e prodhimit dhe të shitjes së gazit natyror, ndërsa shoqëria “Albgaz” sh.a., realizon transmetimin e gazit natyror me anë të linjave të “Albpetrol” sh.a.

- Shoqëria “Albgaz” sh.a., në cilësinë e transmetuesit, funksionon si operator i kombinuar i gazit natyror dhe ka depozituar në ERE kontratën e lidhur ndërmjet shoqërisë “Albpetrol” sh.a. dhe shoqërisë “Albgaz” sh.a. dhe gjen mbështetje në Kodin Civil të Republikës së Shqipërisë, në ligjin nr. 9901, datë 1.4.2008, “Për tregtarët dhe shoqëritë tregtare”, të ndryshuar; në ligjin nr. 7582, datë 3.7.1992, “Për ndërmarrjet shtetërore”; në ligjin nr. 8450, datë 24.2.1999, “Për përpunimin, transportimin dhe tregtimin e naftës dhe gazit natyror dhe nënprodukteve të tyre”, të ndryshuar; në ligjin nr. 102/2015, “Për sektorin e gazit natyror”; në vendimin e bordit të ERE-s nr. 97, datë 23.4.2018, “Mbi miratimin e tarifës së transmetimit të gazit natyror nga shoqëria “Albgaz” sh.a., për vitin 2018”.

- Objekti i kontratës midis “Albgaz” sh.a. dhe “Albpetrol” sh.a. është transmetimi i gazit natyror nga shoqëria “Albgaz” sh.a., kundrejt një tarife transmetimi për llogari të shoqërisë “Albpetrol” sh.a.

- Çmimi i ofrimit të shërbimit të transmetimit të gazit natyror, sipas kësaj kontrate është ai i vendosur në bazë të vendimit të ERE-s nr. 97, datë 23.4.2018, i ndryshuar me vendimin nr. 60, datë 15.04.2019, për tarifat

e shërbimit të transmetimit. Tarifa aktuale për “Albgaz” sh.a., me cilësinë e transmetuesit të gazit natyror dhe “Albpetrol” sh.a., me cilësinë e prodhuesit të gazit natyror, është 28 lekë/m³, pa TVSH.

- ERE i është drejtuar shoqërisë “Albgaz” sh.a., me shkresën nr. 206 prot., datë 7.3.2019, me anë të së cilës i ka kërkuar këtij të fundit paraqitjen sa më shpejt të të ardhurave të kërkuara për të mundësuar zhvillimin normal të aktivitetit të shoqërisë “Albgaz” sh.a. për vitin 2019 ose ndjeshmërinë/pritshmërinë e “Albgaz” sh.a., në lidhje me mjaftueshmërinë e tarifës në fuqi të miratuar me vendimin 97, datë 23.4.2018, të bordit të ERE-s.

- Kjo kontratë rregullon të gjithë marrëdhënien e shërbimit të transmetimit të gazit natyror ndërmjet palëve, duke përfshirë, por pa u kufizuar, edhe programin, normimin, livrimin dhe pranimin e gazit natyror për periudhën kohore 1.1.2019–31.12.2019.

- Të gjitha kushtet e kësaj kontrate konsiderohen thelbësore dhe mund të shtohen ose të ndryshohen nëse vullneti i të dyja palëve është shprehur paraprakisht me shkrim dhe me miratimin nga bordi i ERE-s.

- Kjo kontratë përbën marrëveshjen e vetme dhe të plotë midis palëve, në lidhje me ofrimin e shërbimit të përcaktuar në objektin e saj dhe zëvendëson çdo marrëveshje verbale ose të shkruar të mëparshme ndërmjet palëve.

Për gjithë sa më sipër cituar, bordi të ERE-s

VENDOSI:

1. Të miratojë kontratën me nr. 1026 prot., të “Albpetrol” sh.a., datë 4.2.2019 dhe nr. 25 prot., të “Albgaz” sh.a., datë 25.2.2019, të lidhur ndërmjet shoqërive “Albpetrol” sh.a. dhe “Albgaz” sh.a., për shërbimin e transmetimit të gazit natyror, për një afat njëvjeçar, duke filluar nga data 1.1.2019–31.12.2019, me ndryshimet, si në vijim:

a) Neni 1, “Baza ligjore”

Kjo kontratë lidhet në bazë të Kodit Civil të Republikës së Shqipërisë, të ligjit nr. 9901, datë 1.4.2008, “Për tregtarët dhe shoqëritë tregtare”, të ndryshuar; të ligjit nr. 7582, datë 13.7.1992, “Për ndërmarrjet shtetërore”, të ndryshuar; të ligjit nr. 102/2015, “Për sektorin e gazit natyror”; të ligjit nr. 8450, datë 24.2.1999, “Për përpunimin, transportin dhe tregtimin e naftës dhe të gazit dhe të nënprodukteve të tyre”, të ndryshuar; të vendimit nr. 848, datë 7.12.2016, “Për krijimin e shoqërisë “Albgaz” sh.a. dhe përcaktimin e autoritetit publik që përfaqëson shtetin si pronar të aksioneve të shoqërive “Albpetrol” sh.a. dhe “Albgaz” sh.a., të ndryshuar, ku Këshilli i Ministrave ka miratuar krijimin e autoritetit publik që është përgjegjës për transmetimin, shpërndarjen dhe depozitimin e gazit natyror në Republikën e Shqipërisë; të Vendimit të ERE-s nr. 269, datë 21.12.2018, si dhe të vendimit nr. 60, datë 15.4.2019, si dhe të akteve nënligjore të dala në zbatim të tyre.

b) Neni 3, “Qëllimi i kontratës”

3.3.2 “... Kjo kontratë rregullon, kushtet dhe afatet për realizimin e këtij bashkëpunimi midis prodhuesit dhe operatorit”.

c) Neni 4, “Afati i kontratës”

Kjo kontratë lidhet për një afat 1-vjeçar (njëvjeçar), duke filluar nga data 1.1.2019, që është dhe data e hyrjes në fuqi të kësaj kontrate (data efektive).

d) Neni 5, “Tarifa e shërbimit”

5.1 Për transmetimin e gazit natyror tarifa do të jetë 28 (njëzet e tetë) lekë/m³, pa TVSH, në bazë të vendimit të ERE-s nr. 269, datë 21.12.2018, si dhe të vendimit nr. 60, datë 15.4.2019.

e) Neni 6, “Faturimi dhe mënyra e pagesës”

6.1 “... mënyrën e përlogaritjes së tarifës për t’u paguar ...” është zëvendësuar fjala “tarifë” me fjalën “detyrim”, si vijon “... mënyrën e përlogaritjes së detyrimit për t’u paguar ...”.

f) Neni 10, “Leximi dhe faturimi”

10.5 Diferenca e krijuar midis sasisë së livruar, sipas pikës 7.1 dhe sasisë së transmetuar, sipas pikës 7.2, të nenit 7, të konvertohet në vlerë nga Prodhuesi Asia* (çmim shitje + kosto transmetimi).

g) Neni 12, “Planifikim dhe ndërprerja e livrimit”

“Asia e parashikuar për t’u livruar nga prodhuesi, shoqëria “Albpetrol” sh.a., që do të transmetohet nga operatori, shoqëria “Albgaz” sh.a. është 600.000 (gjashtëqind mijë) Nm³, për periudhën 1.1.2019–31.12.2019.

h) Neni 14, “Përgjegjësia për dëmet”

14.2 Operatori është përgjegjës për çdo çlirim të gazit gjatë procesit të transmetimit të tij.

i) Neni 17, “Të ndryshme”

17.5 Zgjidhja e kësaj kontrate nuk do t’i lehtësojë palët nga detyrimet që kanë përkundrejt njëra-tjetrës deri në datën e miratimit të zgjidhjes së saj nga ERE ose nga detyrimet të cilat lindin nga veprimet e kryera përpara kësaj date.

2. Palët kontraktore të depozitojnë në ERE, “Kontratën për shërbimin e transmetimit të gazit natyror”, të lidhur ndërmjet shoqërisë “Albgaz” sh.a. dhe shoqërisë “Albpetrol” sh.a., për periudhën 1.1.2019–31.12.2019, të nënshkruar nga palët.

3. Drejtoria e Çështjeve Ligjore të njoftojë palët për vendimin e bordit të ERE-s.

Ky vendim hyn në fuqi menjëherë dhe i shtrinë efektet nga data 1.1.2019.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 45 ditëve kalendarike nga data e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti